

23 April 2009

Jaargang 2 – Uitgawe 11

## In hierdie uitgawe

- Voorblad
- Beroepe en standplase
- Predikante en gemeentes
- Ander nuus
- Agterblad

Teken in op e-Hervormer en ontvang elke uitgawe gratis per e-pos!

- Besoek die webwerf by [www.hervormer.co.za](http://www.hervormer.co.za) en klik op die "Teken in"-opsie; of
- stuur 'n e-pos aan [karen@nhk.co.za](mailto:karen@nhk.co.za)

Stuur 'n e-pos met nuus en berigte aan die redaksie by [produksie@nhk.co.za](mailto:produksie@nhk.co.za)



**Ons droom is dat alle mense in Jesus Christus sal glo as hoop vir die wêreld**

## Skakels

Webblad van die Hervormde Kerk  
Die Hervormer  
e-Hervormer

[www.nhk.co.za](http://www.nhk.co.za)  
[www.hervormer.co.za](http://www.hervormer.co.za)  
[www.hervormer.co.za/e\\_Hervormer.html](http://www.hervormer.co.za/e_Hervormer.html)



Toe Hy hulle voete klaar gewas het, sê Hy vir hulle:  
"Verstaan julle wat Ek vir julle gedoen het?"  
Uit Johannes 13: 12

## VOORBLAD

### Ek wil vir julle 'n toekoms gee, 'n verwagting!

'n Balling is iemand wat uit sy land verban is. In Bybelse konteks is dit Israel wat weggevoer word in ballingskap na byvoorbeeld Babilonië. Sommige teenstanders van die ou bedeling het in selfopgelegde ballingskap gegaan. Mense wat geëmigreer het, mag hulleself as ballinge in 'n ander land beskou vanweë die situasie in die RSA. Daar is waarskynlik mense oor die kleurgrense heen wat hulleself as ballinge beskou in hierdie eie land van ons. Ballinge omdat hulle magteloos voel, omdat hulle uitgelewer is aan swak dienslewering, omdat 'n onderwysstelsel leerders in die steek laat, terwyl misdaad ander weerloos en bang laat. Politici sal haastig verklaar dat hierdie bedeling die resultaat is van 'n vrye en regverdige verkiesing. Tog is daar toenemende ontnugtering en groeiende kommer oor die situasie tans.

Jeremia 28 en 29 vertel van twee profete wat 'n boodskap het vir die volk in Babiloniese ballingskap, maar dit is twee uiteenlopende boodskappe. Gananja profeteer in die naam van die Here en belowe dat die ballinge oor twee jaar met al die tempeltoerusting uit Babel sal terugkeer. Jeremia profeteer dat die ballingskap nog sewentig jaar sal duur. Die een profesie vol hoop en belofte, die ander een verpletterend. Die verskil – 'n oorweldigende agt en sestig jaar.

Op eie bodem kos dit geen profeet om te voorspel dat die ANC nog vir 'n onbepaalde tyd gaan regeer nie. Politieke landskappe aan die suidpunt van Afrika verander oor die algemeen nie vinnig nie. Die vraag by baie: Gaan dit met 'n twee derde meerderheid wees of nie? Hoe gaan die regering daarna uitsien onder presidentskap van Jacob Zuma? Gaan sy twyfelagtige aanloop tot die hoogste regeeramp van die land 'n ewe twyfelagtige neerslag vind in sy regeertermyn? Gaan die knelpunte onder sy leiding verbeter of nie? Hoe lank nog voor daar 'n draaipunt kom na beter administrasie en dienslewering? Twee jaar... sewentig jaar?

Gananja word ontmasker as valse profeet en sterf dieselfde jaar. Jeremia se profesie bereik die ballinge met die verskriklike nuus dat dit nog sewentig jaar is voordat hulle huis toe gaan. Daarmee saam, gewone praktiese raad oor hoe om hierdie tydperk deur te sien (29: 5-7): *Bou vir julle huise en bewoon dit, lê tuine aan en eet die opbrengs daarvan, trou en bring kinders in die wêreld... Bevorder die belange van die stad waarheen Ek julle in ballingskap weggevoer het...* Hierdie raad sou die belangrikste oorlewingsmeganisme vir ballinge wees in die jare wat voorlê.

Hulle moes teen wil en dank kies om die lewe in al sy fasette te leef. Die gewone oorlewingsmaatreëls het gegeld maar veral die bevordering van almal se belange, omdat beide balling en heerser daarby sou baat ... *want (hulle) belange is ook julle belange*. Hierdie advies geld vandag ook. Bly werk aan dit wat voorhande is en waaraan jy 'n verskil kan maak. Die teks bied heelparty werkwoorde vir oorlewing na 2009 se verkiesing, soos byvoorbeeld: bid – bou – bevorder! Doen dit in landsbelang en doen dit in eie belang. Doen dit in die geloof dat God steeds 'n toekoms gee, 'n verwagting!

Ds André Ungerer



## BEROEPE EN STANDPLASE

Kontak asseblief die webbladredakteur, prof Ernest van Eck, by [ernest.vaneck@up.ac.za](mailto:ernest.vaneck@up.ac.za) om vakante standplase op die Kerk se amptelike webblad by [www.nhk.co.za](http://www.nhk.co.za) te plaas.



Ds Petrus Harmzen

Ds Monja-Lize van Belkum

### Beroep ontvang

- **Ds Petrus Harmzen** van die kombinasie Hartbeesfontein/Gerdau na die Kurumankombinasie
- **Ds Monja-Lize van Belkum** van Horison Roodepoort na Oudtshoorn (deelyds)
- **Ds Werner Venter** van Schoemansdal na Rustenburg-Kloof



Ds Werner Venter

Prop Jan Claassen

### Beroep aanvaar

- **Prop Jan Claassen** na Strand

### Beroep bedank

- **Ds Johan Ayres** van Germiston na Krugersdorp-Wes
- **Ds Petri van Rooyen** van Rooihuiskraal na Vaalharts
- **Ds Jaco Vogel** van Heidelberg na Rustenburg-Kloof
- **Ds Frans Ras** van Eendracht na Nigel



Ds Johan Ayres

Ds Petri van Rooyen

### Vakante standplaas

- **Gemeente Randburg** beskik oor 'n vakante volsorgstandplaas. Die gemeente word tans bedien deur ds CJ van Wyk, en die tweede predikant sal onder sy leiding werk. Aansoeke moet **teen Vrydag 15 Mei** ingehandig word, en die pos sal vanaf 1 Julie 2009 beskikbaar wees. Stuur aansoeke aan die skriba by [ElnaV@nhk-randburg.org.za](mailto:ElnaV@nhk-randburg.org.za), of skakel mev Elna van der Walt by 086 547 3586 of 011 789 4568 (faks). Volledige besonderhede oor die pos is beskikbaar op die Kerk se webblad by [www.nhk.co.za](http://www.nhk.co.za).
- **Gemeente Welgelegen-Pietersburg** beskik oor 'n vakante volsorgstandplaas. Die gemeente deel die kerkgebou, saal en kategeselokale met Gemeente Oostelike Pietersburg. 'n Skakelkomitee hanteer alle gemeenskaplike sake. Kandidate moet bereid wees om 'n erediens in die gemeente te lei en 'n gesprek met die beroepskomitee te voer. Aansoeke met 'n volledige CV moet die gemeentelike kerkkantoor bereik **voor of op 15 Mei 2009**, of kan elektronies na [nhk.welgelegen@absamail.co.za](mailto:nhk.welgelegen@absamail.co.za) gestuur word. Die kerkraad behou die reg voor om 'n predikant te beroep wat nie aansoek gedoen het nie. Navrae kan gerig word aan oudl Antonie van Staden by 082 576 6355.



Ds Jaco Vogel

Ds Frans Ras

## PREDIKANTE EN GEMEENTES

- **Ds Cobus Manders en ds Mari du Plessis-Manders** van Gemeente Suidoos-Witbank se babadogtertjie Annemae is Maandag 6 April teen 09:54 gebore. Sy het 3,3 kg geweeg en is 50 cm lank. Cobus laat weet: *Sy is regtig 'n engeltjie!*
- **Dr Hennie van Deventer** laat weet dat hy met dankbaarheid aan die Heer van die kerk kan getuig dat sy onlangse operasie 'n sukses was en dat sy hart nou weer redelik normaal funksioneer. Dit bring mee dat hy beskikbaar is vir gemeentes om met die lei van eredienste te help. Sy huistelefoonnommer het na 012 348 5514 verander en sy selnommer is dieselfde, naamlik 082 786 8448. Gebruikers van die *Almanak* kan gerus ook dr Van Deventer se besonderhede op bladsy 39 wysig.



Annemae Manders

Dr Hennie van Deventer



Ds en mev Van Niekerk



Ds Casper Steenkamp Dr Malan Storm



Ds Etienne Fourie Dr Gerrie Bloem

- Op Sondag 22 Maart het Gemeente Premiersmyn saam met **ds CJS (Macquasi) van Niekerk**, sy familie en vriende sy 60ste ampsjubileum gevier. Hy het 'n trefende boodskap uit onder andere Handeling 1 oor suiwer evangelieverkondiging gegee, terwyl sy dogter Marietjie die orrelbegeleiding waargeneem het. Talle emeriti, predikante en ander ampsdraers van vorige gemeentes en ringe was teenwoordig. Vir die gemeente was dit 'n voorreg om die geleentheid saam met oom Kerneels en tannie Didi, wat al sulke diep spore in die Kerk gelaat het, te geniet.
- **Mev Anna de Wet-De Waal**, eggenote van **wyle prof JI de Wet**, is op 16 April oorlede in die ouderdom van 82 jaar. Sy word op Vrydag 24 April om 09:30 begrawe uit Gemeente Pretoria-Oos en die diens word waargeneem deur ds Thomas Dreyer (sr) en prof Piet Geysers. Die teraardebestelling vind om 08:30 plaas by die Pretoria-Oos begraafplaas. Ons innige simpatie gaan aan die familie.
- **Ds Rudi (RDJ) van Wyk**, medies ongeskikte predikant, het verlede week 'n ligte beroerte gehad. Hy is nog in die Wilgers-hospitaal in Pretoria, waar verdere ondersoeke gedoen word.
- **Ds Casper Steenkamp** het besluit om na 25 diensjare te emeriteer. Die Kommissie van die Algemene Kerkvergadering (AKV) het sy aansoek goedgekeur en hy aanvaar emeritaat op Sondag 26 April. Die emeritaatakte word deur die voorsitter van die Kommissie van die AKV, prof Theuns Dreyer, aan hom oorhandig.
- **Dr Malan Storm** besoek tans die ring van Dorsland vir hulle ringsvergadering op 23 en 24 April by Gemeente Namibkus.
- Lede van die **Moderamen en Taakspan**, naamlik prof Theuns Dreyer, drr Christo van der Merwe, Fanie Pretorius en die Administrateur, mnr Kobus Viljoen, het op Maandag en Dinsdag 20 en 21 April besoek afgelê by Gemeente Durban-Suid om saam met die Ringskommissie en die kerkraad te besin oor die toekomstige bediening van die gemeente. Onder leiding van die Ringskommissie en konsulent, ds Jacques Pieterse van Laer Suidkus, sal uitvoering gegee word aan die beplanning. Die toetrede van 'n brugpredikant om vir die volgende maande leiding te gee, is die eerste stap.
- **Ds Etienne Fourie** van Kempton en twee van sy lidmate het verlede naweek die lidmate in Zimbabwe besoek. Dit was die gewone maandelikse besoek. Hy het die eredienste in die Laeveld op Vrydag 17 April en op Harare op Sondag 19 April gelei. Gemeente Kempton het gesorg dat die sleepwa en voertuig vol kosvoorrade gemaak word en ook kontant ingesamel om die vervoerkoste te help delg. Groot dank word deur die lidmate en die bedieningskomitee aan ds Fourie, sy metgeselle en die gemeente betuig vir hulle besondere belangstelling en insette.
- **Dr Gerrie Bloem**, emerituspredikant en pastorale hulp in Gemeente Vredefort, se poskode is (Riverwalk) **2538** en nie 2583 nie. Wysig asseblief die gegewens op bladsye 37 en 108 in die *Almanak*.
- **Ds Ferdie Nortjé** van Gemeente Outeniqua se nuwe e-posadres met ingang van 21 April is **ferdienortje@telkomsa.net**. Wysig die gegewens asseblief op bladsy 148 van die *Almanak*.
- **Die volgende predikante verjaar van 23 tot 30 April**, en word van harte gelukgewens:
  - Donderdag 23 April: Di Francois Evert en Casper Steenkamp
  - Vrydag 24 April: Ds Herman van den Berg
  - Saterdag 25 April: Prof Andries van Aarde, en di Wimpie van Schoor en Rika van Staden



“Ds Kathleen Smith het in die *e-Hervormer* van 2 April dalk die regte punt aangeraak: dat ons ons, om die MIV-probleem en so ook alle ander probleme op te los, eerder na die Here moet keer as om te probeer om die wêreldse simptome te genees. Hiermee wil ons ds Smith hartlik ondersteun in haar oproep aan ons om *konkreet die baken van hoop te wees wat Christus se lig vir die wêreld konkretiseer.*”

Joggie en Martie van Zweel



- Sondag 26 April: Ds Paul Kern
  - Maandag 27 April: Ds Kálmán Papp (jr)
  - Dinsdag 28 April: Ds Frans Marais
  - Donderdag 30 April: Ds Wimpie Steyn
- **Oorwinningskinders** se konsert met jong Hervormers word aangebied deur **Gemeente Vaalharts** tydens hulle basaar op Vrydag 1 Mei. Navrae kan gerig word aan Riaan Esterhuizen by 082 453 6889. Vir optredes skakel dr Wilhelm Coetzer by 012 322 885 of mev Marita Fourie by 082 486 2420
  - Op Saterdag 2 Mei om 09:00 bied **Gemeente Delareyville** die **Genl Delareyfees** aan. Die gaskunstenaar is Bok van Blerk en die toegang is gratis. Daar sal 'n veiling met unieke artikels wees, hope hoë kwaliteit vleis teen billike pryse, en 'n verskeidenheid lekkernye. Daar is ook vermaak vir die kinders, en 'n kompetisie met as 1ste prys 10 topverse en 'n bul of R35 000, 2de prys 10 skaapooie of R6 000, en 3de prys 'n koedoe en 'n blesbok. Vir meer inligting of om 'n kompetisiekaartjie te koop, kontak ds Leslie Kern by 083 588 1332, Willie Naudé by 083 411 7795, Charles Olivier by 082 524 9091, of die gemeentelike kerkkantoor by 053 948 1992.
  - **Gemeente Schweizer-Reneke** bied op Donderdag 7 en Vrydag 8 Mei 'n Wildfees aan. Die fees skop af met 'n wildete die Donderdagaand. Daar gaan ook 'n veiling plaasvind van wild en ander artikels. 'n Orkes sal optree en die kaartjies beloop R100 per persoon. Die Vrydagmiddag is dit tyd vir basaar. Vleis sal teen billike pryse te koop aangebied word. Kontak ds Rudi Schoeman by 082 557 7340 of Susan Kotzee by 083 758 9972 vir meer inligting.
  - **Gemeente Randburg** hou op Saterdag 30 Mei sy jaarlikse **basaar**. Dit is 100% ten bate van barmhartigheid. Alle belangstellendes word genooi om dié dag iets vir liefdadigheid te kom gee en die feestelikhede te geniet. Daar is ook 'n **basarkompetisie** waarin 'n **bootreis** vir twee persone op die MS Melody na die Portugese Eilande gewen kan word. Die prys sluit in retoer vliegkaartjies vanaf Johannesburg na Durban, lughawebelasting, vervoer tussen die lughawe en die hawe, en 4 nagte op die MS Melody in 'n buitekajuit (alle etes ingesluit). Kaartjies is beskikbaar teen 'n donasie van R100. Kontak mev Elna van der Walt by [ElnaV@nhk-randburg.org.za](mailto:ElnaV@nhk-randburg.org.za) of 011 787 4893.
  - **Gemeente Groot Marico** hou vanjaar hul jaarlikse karnaval op Saterdag 6 Junie. Hierdie karnaval is landwyd bekend vir die lekkerste pannekoek, die sappigste sosatie, die grootste stuk wildsbiltong, droëwors wat jou na jou asem sal laat snak en Marico se wonderkind – mampoer. Daar sal ook konfytte van elke kleur en geur beskikbaar wees, en handgemaakte meubels van olienhout sal saam met ander kosbare items opgeveil word. Jy kan 10 verse wen of R30 000 in kontant as jy 'n kaartjie teen R100 koop. As jou boerdery reeds op dreef is, skryf jou osse in vir die swaarste-oskompetisie – die swaargewigte het die skaal al tot ver bo 1 000 kg getrap. Gaan probeer skyfskiet, kleiduifskiet en kleilat-gooi, en luister na die gaskunstenaar, Pieter Koen. Navrae kan gerig word aan Boet Nel by 083 700 9751 of ds Willem Sauer by 079 699 1237. Besoek gerus ook die webwerf: [www.maricosafarikarnaval.co.za](http://www.maricosafarikarnaval.co.za).
  - **Gemeente Wesmoot** in Pretoria hou op Saterdag 6 Junie vanaf 08:00 basaar op die parkeerterrein van Trade Centre. Daar sal vermaak wees vir die kinders, 'n teetuin met tuisgebak, en al die lekker dinge wat net by kerkbasars te kry is.

## ANDER NUUS

- **Die Ondersteuningsraad** wil gedurende die **September-skoolvakansie 'n kamp** aanbied vir 100 kinders wat in pleegsorg verkeer, by kinderhofondersoeke betrokke is, aan verwaarlosing en mishandeling blootgestel is, ensovoorts. Dit

is die 10de sodanige kamp en is uitgebrei sodat kinders van ander kantore van die Raad ook betrek kan word. Tydens die kampe word terapeutiese groepwerk deur maatskaplike werkers aangebied. Studente help ook met die aanbieding van bewuswordingsgroepe, rekreasie, sportaktiwiteite en vryetydsbesteding. Die Ondersteuningsraad moet self die fondse vir die kamp genereer. Enigiemand wat kan help om kinders vir die kamp te borg, of wat meer inligting oor die projek verlang, kan Suzanne van Deventer kontak by 012 325 2320, 071 684 7789 of [oraad@telkomsa.net](mailto:oraad@telkomsa.net). Die koste van die kamp is R600 per kind (dit sluit verblyf, etes, vervoer en hulpmiddels in).

- **Die Ondersteuningsraad** bedank graag die volgende verdere **borge** vir hul ondersteuning van die Raad se kinderbeskermingsprojek (fotografiekompetisie) wat gedurende Mei 2009 afsluit:
  - Gemeente Lichtenburg
  - NHSV Lichtenburg
  - H&H Transport
- SENTIK benodig ervare **advertensieverkopers** om op 'n kommissiebasis advertensies vir die Kerk se publikasies te werf. Ons is ook op soek na mense met kennis van die boekhandel wat ons op 'n kommissiebasis kan help met die **bemarking van kerklike literatuur**. Belangstellendes kan dr Wouter van Wyk, Sekretaris: Toerusting, Inligting en Kommunikasie, kontak by 012 322 8885 of [wouter@nhk.co.za](mailto:wouter@nhk.co.za).
- Die **evaluering van voornemende teologies studente** vind elke jaar by UP plaas gedurende die Junie/Julie-skoolvakansie. Matrikulante en persone wat reeds gematrikuleer het, kan aansoek doen vir evaluering om as student van die Kerk te studeer. Aansoekvorms kan aangevra word vanaf die Administrateur, Kuratorium vir die Teologiese Opleiding, Posbus 2368, Pretoria 0001; tel 012 420 5393, faks 012 420 4303; e-pos [betsie.brits@up.ac.za](mailto:betsie.brits@up.ac.za). Die sluitingsdatum vir inhandiging van volledig voltooide aansoeke is 30 April. **Vanjaar se evaluering vind plaas op Vrydag 17 Julie.**
- Die **NHSV hoofbestuur**, in samewerking met die Algemene Diakensvergadering (**ADV**), bied op Saterdag 6 Junie van 09:00 tot 13:30 'n **beraad oor dissipline** aan. Die tema is GESONDE GESINNE, en dit vind plaas by Gemeente Montana, hv Jan Bantjies- en Azanzaweg, Montana, Pretoria. Dr Johan Otto van Gemeente Premiermyn sal praat oor *Gedragspatrone en dissipline binne die gesin: Wat sê die Bybel?* Ansie Kitching, lektor in Opvoedkundige Sielkunde aan Noordwes-Universiteit, behandel *Die skep van instaatstellende ruimtes vir dissipline binne huise en skole*. Marius Botha, dissiplinêre hoof van Hoërskool Garsfontein en deeltydse dosent aan UP, praat oor *Die regte van die gedissiplineerde kind*. Dr Wilhelm Coetzer tree op as programleier. Die organiseerders wil graag dat minstens twee afgevaardigdes per gemeente die geleentheid bywoon, sodat die saak verder in gemeentes hanteer kan word. Inskrywingsgeld beloop R100 per persoon en is betaalbaar voor 15 Mei aan die NHSV hoofbestuur. Dit sluit tee en verversings asook 'n ligte middagete in. Kontak die NHSV kantoor by 012 325 0117. Dit is belangrik om vroegtydig te registreer, aangesien 'n opname gemaak moet word van die getalle.
- Die Bybelgenootskapwet, Wet 15 van 1970, is pas deur die Parlement herroep en die **Bybelgenootskap van Suid-Afrika** funksioneer vanaf 1 April 2009 as 'n artikel 21-maatskappy sonder winsmotief. Ds Gerrit Kritzinger, uitvoerende hoof van die Bybelgenootskap, verseker die kerke, donateurs en ander medewerkers dat, alhoewel die Bybelgenootskap nou deur die bepalings van die maatskappywet gereguleer word, die Genootskap met al sy normale werksaamhede voortgaan om te verseker dat bekostigbare Bybels vir almal beskikbaar is. Hy het die afgelope jaar as 'n droomjaar bestempel, omdat dit

“ Ek is baie beïndruk met die voorkoms en inhoud van die *e-Hervormer*. Baie dankie. ”

Dr Hennie van Deventer



Ds Gerrit Kritzinger

slegs vir die tweede keer in die 188 jaar van die Genootskap se bestaan gebeur het dat meer as 'n miljoen volledige Bybels (1 018 283) in een jaar in Suid-Afrika versprei is. Die inkomste van die Bybelgenootskap het ook met 30% gestyg, terwyl uitgawes met slegs 9% toegeneem het. Tydens die eerste Algemene Jaarvergadering van die artikel 21-maatskappy is die volgende persone tot die Raad van Direkteure verkies: ds CJA Simpson, ds GS Kritzinger, ds HJ Geyer, mnr RC Basson, ds RP van Wyk, prof RS Letšosa en mev MMM de Jager.

- **Kruiskyk TV** ondersteun tans 'n beweging in Suid-Afrika om die oggend van Sondag 26 April, wanneer 200 000 mans in Greytown bymekaarkom, hul dienste so in te rig om die spesifieke oggend vir 9 minute te bid. Van 09:00 tot 09:09 bid Suid-Afrika nie vir die verkiesing nie, nie vir die ekonomie nie, nie vir reën nie, maar dat God ons land genees en ons sonde vergewe. Hulle vra: Ondersteun **GEBED 909** en maak 'n verskil.
- **Belangrike vergaderings tot 29 April**
  - Die Moderamen op Donderdag 23 April
  - Die Ondersteuningsraad se werkwinkel op Donderdag 23 April
  - Die dagbestuur van die ADV op Vrydag 24 April
  - Die Raad vir Apostolaat op Dinsdag 28 April
  - Die Raad vir Gesinsorg op Woensdag 29 April
  - Die Raad vir Ekumene op Woensdag 29 April

## AGTERBLAD

### Konteks van Mei 2009 nou beskikbaar

**Die boodskap van die Mei 2009-uitgawe is: *Dat elkeen van ons iets van die hemel op die aarde sigbaar sal laat word.***

Op Donderdag 21 Mei (10 dae voor Pinkster) herdenk ons die Hemelvaart van Jesus Christus. Dr Wian Kloppers skryf in sy redaksionele berig dat dit die boodskap van Hemelvaart is om verby die sigbare aarde te kyk en die onsigbare hemelse raak te sien. Dit verg 'n skerper oog én 'n opgeskerpte gees om so ver te kan sien!

Die belofte by die hemelvaart dat Christus net so sal terugkom, beteken dat die aarde en aardse bedeling ook belangrik is. Hy kom immers terug aarde toe. Dan eers kom hemel en aarde bymekaar. Ons hoef dus nie self die onmoontlike te doen om hemel en aarde met mekaar te verbind nie. Dit is Christus se taak. Hy sal dit voltooi. Maar dink hoeveel beter ons wêreld sal wees as elkeen van ons intussen iets van die hemel op die aarde sigbaar laat word!

Verskeie artikels in dié uitgawe dra die boodskap dat die kerk vandag 'n baken van hoop moet wees, dat ons so iets van die hemel op die aarde sigbaar kan laat word. Dr Wilhelm Coetzer voer 'n onderhoud met ds Kathleen Smith waarin sy vertel van die uitdagings wat die vigs-pandemie stel aan predikante van ons Kerk. Dr Gert Malan van Mosselbaai was teenwoordig tydens die laaste ure van 'n gelowige wat 'n vigslyer was. Op aangrypende wyse vertel hy van die berusting en die uitreik, en die vergifnis.

Ander artikels vier die mooi dinge wat ons elke dag mag ervaar. Dr Sanrie de Beer resenseer 'n aangrypende film, Tessa Oppermann gesels oor besondere boeke oor kinderopvoeding, en Louise Geysers se nuwe reeks oor ons inheemse natuurerefenis begin met 'n artikel oor Suid-Afrika se kampioenbome.

\*\*\* Kontak mev Susann van Zyl van SENTIK by 012 322 8885 of stuur 'n e-posboodschap aan [sentik@nhk.co.za](mailto:sentik@nhk.co.za) indien u op die tydskrif wil inteken. U kry 10 uitgawes teen slegs R110.

Redakteur: Dr Gerhard Lindeque  
Subredakteur: Ds André Ungerer  
Kerksnuus: Ds Fanie Pretorius  
Teksversorger: Mev Tessa Oppermann  
Uitlegkunstenaar: Mej Francis Coertse

Ons droom is  
dat alle mense  
in Jesus Christus sal glo  
as hoop vir die wêreld